

四庫全書

集部

欽定四庫全書

嵩山集卷十七

宋晁公遡撰

啟

眉州到任謝執政啟

不謂姓名徹政事堂之右地遽膺制詔賜防禦郡之左
符揣分非宜撫躬自愧某切觀茲地蓋異他邦風俗甚
文有蘇程石典刑之尚在江山良美與彭蜀漢境土之

相連久矣所傳號其難治通儒宿學則不令而治庸夫俗吏則雖令不從廟堂何自於聽聞忽加除授閭里皆為之驚嘆未有識知豈徒無補於縣官亦恐見輕於父老某官輔佐明主增隆丕圖大賢無所不容兼短長而並用上策莫如自治冀內外之舉安豈期蠢愚亦與選用五十無大過諒知更事之寢多三千惟一心當體同德而不懈某敢不自知慶幸親見升平地接蠻夷屬雪山之無警民安田畝喜天鼓之不鳴

上政府啟

太宰詔王必礪世而磨鈍大夫授郡當治業以赴功外
不乏於軍興內無困於民力使匹夫匹婦之得所免吾
君吾相之為憂惟有於歲月之間能副上意不宜於職
事之外輒通私書若竿牘之屢修致道途之相望自非
其敵誰復敢然某竭來効官忽至踰歲每聞二府大臣
當出處之際初無一介行人達聲聞於前以小事大其
體則宜由卑瀆尊於禮不可惟將飢餓於土地則合赴

愬於門庭載念羈窮行及換代儻歸休有地亦飯蔬沒齒而無言顧貧病可憐須疾首蹙頞而相告庶幾得祿不至向隅某官幘幪斯民衡石多士以康濟之才而力行康濟之政有恢復之慮而不示恢復之形期於數年成此偉績惡不仁者其為仁矣愛四海而皆推恩思有飢者由己飢之恐一夫之不被澤仰觀忠厚之意具知宏遠之規某竊恃高明遽陳悃悞波之餘者君及晉庶軫大賢惻隱之心人莫如於我敬齊肯為虛言寒溫之

問靜思干犯併切兢惶

上楊叅政啟

猥被上恩改臨劇郡屬問途於境上與故老言知休駕
於里中有大臣在拊躬自慶進記宜先竊以古之為邦
政有先務莫敢無人於子思之側未嘗不式於干木之
閭盡其禮蓋欲聞其言敬其德所以訓其下而況廟堂
之老近居鄉黨之間藉其德望則足以化民承其風旨
則足以為政豈其迂拙乃此遭逢某官士之準繩國之

者艾卷懷天下之智謀而居於五畝之宅收斂天下之
法式而寄於三里之城浩然而歸始如孔子之反魯淡
乎不出皆惜孟軻之居休儀型可師習俗自美人皆成
於謹厚吏相戒於貪殘吾黨小子不知所裁盡持循於
善道我孫黎民亦職有利咸安樂於故鄉顧刺史何幸
之多將部封不勞而治某睽離固久就見匪遙念樂正
子之來未定舍館要事奇章公以禮乃重朝廷

與楊叅政到任啟

久疲遠道念衣服之不潔清將謁大臣須沐浴而後齋
戒雖已入境未遑款門當諏日於卜人復請期於侍史
瞻依良邇向慕尤深某官歸榮故鄉震耀多士霖雨之
澤斂之下施於里閭台星之光赫然上見於分野益令
茲地加重他邦某頃輒通牋特蒙修報人皆相謂禮宜
絕於百僚情有可言使更馳於一介其為干冒併切兢
惶

問候虞叅政啟

樂聖避賢願歸印綬過家上冢言返里閭釋政省之憂
勞獲故鄉之安便難稽遠業暫佚真祠某官名高搢紳
勲在社稷昨遇有為之會皆稱難得之時若不靖夫邊
烽漢則幾殆今猶傳於境外秦豈無人帝不忘於念功
意將倚以納誨為政者每人而悅誰復能然不知者謂
我何求公亦奚恨惟大臣進退之際本前賢出處之常
溺者由己溺而饑者由己饑莫有識胷中之志仁者謂
之仁而智者謂之智姑一付天下之言某早被深知肯

同流俗當將相和而士附自揣涼薄而安敢前及賓客
衰而家居則思親近而不忍去輒懷管見仰測天心聘
使或來必歎張昭之不在國家所賴寧容裴度之常閑
延英之開跂踵可俟

謝吳宣撫啟

郡縣轉輸正當流馬之運詔書選授忽守卧牛之城雖
有懼於夙興復退思而知幸竊以遠方梗命累歲窺邊
顧幅員凡在於提封而安樂不殊於平日至若蠢愚所

領之郡尤如從容無事之時阡陌為農兵革之容不識里閭好學絃誦之聲相聞夫何餘生得此樂土茲蓋某官書功盟府為國長城比聞外敵之交侵豈特遐方之所恃坐而制勝有長轡遠馭之謀逸以待勞無亡矢遺鏃之費遂令巡屬皆荷生成某敢不効職惟勤撫躬自慶要須督父老之力穡致周積倉恨不遣子弟以戍邊導漢故事

賀宣撫吳郡王啟

舍爵于廟聖主深嘉其功裂地而王天下猶恨其晚歡
騰有衆榮冠當時竊以用兵以來幾四十載帥師於外
凡六七公孰有兄弟父子相率以守邊致使官府都鄙
常為之安堵國家所賴威望獨高宜備禮以臨軒并闔
門而行賞某官自授齋鉞隱為長城敵人避其鋒敢潛
窺於塞下士卒服其德皆樂屬於軍中頃出武都坐收
德順將入關而拓境忽受詔以班師非惟惜功名於難
得之機蓋念遺君父以未除之患如聞行路巴人蜀人

之有言歷數近年韓王張王之莫及比執介圭而入覲
特歌出車以勞還都邑爭先而聚觀陞楯合語而歎息
舉家之經百戰共謂其難即日而封三侯未足以報併
加寵數式表元勲豈與彭越之同功更過汾陽之異姓
世祚東海必傳後嗣之子孫畫像南宮盡掩中興之將
帥某喜聞冊命阻賀轅門帳御如漢王之居想益隆於
體貌尊寵拜顯宗之傳顧豈限於彛章請今太史之屢
書傳作宗臣之盛事

謝監司帥臣啟

比試治民儉於百里苻叨易地遠之一邦始者入境以
觀風號其通經而知法四邑著籍之戶蓋盈五萬三歲
較藝之士殆至六千絃歌之聲閭里相接西蜀成都之
大有不及者東漢大學之盛蓋庶幾焉故多才智之民
尤難牧守之任為政未盡善員薪必議於市中讀書不
知方斲輪亦笑於堂下賴高明之臨按致教化之流行
悉稟成規庶幾無事某官宣上德意為國信臣人主如

堂實有賴於廉陞庶民惟草皆自偃於德風官吏無不
洗心愚蠢可以安位但當遵守無可施為某敢不更以
詩書訓其鄉黨仕無遠近實與衆內諸侯之不殊政有
迂疎亦恐泉中老翁之見笑

賀樊漕啟

即家而拜鄉黨有光乘傳復來父老相賀竊以國之遣
使職在觀風均節一道之盈虛考察四民之善惡閭里
欲為浮薄而不敢州縣皆以有無而相通眷我提封異

於他郡俗喜譏議可畏文士之筆端家藏詩書乃多在
庾之粟粒地貧則斂之不足人巧則服之也難今得學
古通明之才而當持節循行之任况當臨撫罔不周知
必將條教不日而成於是蠢愚可得而治實為幸會尤
極欣愉某官學問精深性資沈厚文章深得其要有三
代坦明之言政事尤為所長如兩漢循良之吏比嘗漕
引復以最聞致正宁之咨嗟賜鋒車而促召歷觀近世
皆不俟駕而亟行獨歸故鄉乃遂杜門而高卧聖主益

為之嘉歎大邦嘗畀於便安以為優游田園暮月然後之郡不若寵賜旄節功利即可及民恩隆如斯公起可矣某幸茲守土聞彼聚談皆傳昔日之曾來亦愧休聲之莫繼雖宰予不雕之木朽質難追而召伯所憩之棠清陰猶在栽培罔怠矜式無忘

賀趙總領轉官啟

天子大計三年應乃懿德命秩加進一等並于正卿雖咸謂之殊恩顧猶稽於大用某官才堪富國德足庇民

念餽餉之久勞俾師徒之宿飽在廷皆思其至得侍同
朝當宁方倚其能可使治賦難於選代寵以褒遷近者
天語之遠傳憫吾民力之重困特煩考覈將議蠲除蓋如
疾病之可憂甚於膏之上育之下或恐簿書之難信謂
其有若無實若虛惟惻隱之深仁必推行於上意皆倒
戈以北正敵人徹戍而盡歸有大造于西使諸郡給軍
之大減庶幾薄賦不致乏興即見大門受陽報於元窮
真是上穹以陰功而相畀某敢同闔部亟遣奉牋佇觀

召節之來茲又將賀想開宣室以待不可以留

賀陳茶馬啟

帝念權牧擢華省之望郎職在清華加內朝之延閣訓
辭甚寵眷倚益隆竊以法始於前代而密於近年效見
於本朝而盛於今日既取其利以寬民力又發其餘以
空敵資儻能事舉而政修可使兵強而國富公來何晚
衆謂有時某官才宜六卿名滿九牧豈止從容於臺閣
固當謀議於廟堂不遂持從橐於中乃使乘使輶於外

惟試之詳者蓋欲大用而知之深者特觀遠猷僅取三千匹而還顧李廣利之可笑止增百萬緡以獻若陸師閔其何功必思利害之相權即掩古今而專美坐臻滋殖誰肯伐園以避其征盡致駿良馬有數皮而歸其直迄登休績亟列近班某獲在部封行奉條教當備執驅之校無後會期更繼思臧之詩載形歌頌

賀任運使被召啟

乘使者之傳久勞遠方招大夫以旌蓋思至論想黼宸

之虛寧望鋒車之亟來凡在提封切相與語雖憂其去
無以芘覆於下復喜所願遂將論列以聞非徒成就於
功名抑亦慰滿其郡縣某官早負成德每懷永圖共推
蜀部之英宜預漢廷之議嘗欲安民而濟衆有伊尹心
誰敢較德以量才與諸任齒暨當漕引深察盈虛安得
杼軸空而漫不知坐視倉庫竭而督愈急傷異時之聚
斂盡責所無冀抗疏以建明悉除其弊方下巡屬各具
條疏乃者南面之朝慨然西顧而歎見虞公而稱五絕

可為大臣計孟子所謂一鄉必皆善士無煩於外遽召
以還與其通進於銀臺之前曷若指陳於玉階之上民
斯胥慶帝亦有言喜朝夕納誨輔台以其入覲殆神靈
使公教我哀此矜人須即日以施行俾有邦之休息某
茲因贊喜輒敢問途齋航果濟於大川敝邑實為於通
道君召不俟駕固闔境之莫留客入則就階尚迎門之
匪遠

嵩山集卷十七

欽定四庫全書

嵩山集卷十八

宋 晁公遡 撰

啟

謝夔路監司啟

初至部封未習民俗坐堂上而稱太守固已甚慚視衆
中而見老翁殆將竊笑私為之懼敢負所知追思昨者
稟受之良規尚可取以施行於今日某官列州承檄多

士向風將為君子而為野人使之各得其所不可小知而可大受宜其進用於朝乃眷遠民獨為厚幸盡涵濡於美化如安樂於平時今天下書同文蓋有待乎於變諸大夫皆矜式茲特見於所臨某近蒙薦論雖去巡屬必稱承流宣化之任不辱眷私庶使陳義秉法之民無可譏切

謝成都鈴轄啟

佩刺史之印綬實領兵符望大將之鼓旗亦有軍禮屬

當視事之始敢廢通牋之儀某官才高和門功在盟府
可與古人而並駕豈徒敵國之知名已試治民季布守
股肱之郡更宜入衛祈父為爪牙於王孰謂清時尚留
遠服但使四川之地恃若萬里之城何幸斯人再見雪
山之重寧久於外終列雲臺之圖某仕本為貧器非適
用預憂他日之瘠曠正賴諸公之保持竭其土地之征
亦已極矣責以軍旅之事則願學焉

賀夔路周運使啟

治民考功既上三年之最計戶轉漕遂煩六轡之驅煥
乎皇華溢於鄰壤某官才任煩劇聲聞京師早讀傳家
之書典刑具在蓋深開物之智議論有餘茲擢領於轉
輸必更圖於滋殖力為勸課盡使長刀短笠以燒畬皆
有蓋藏無復小市孤城之爭米第恐鋒車之至不容坐
席之溫某慕用良深披承尚阻雖百書不如見面未接
英游而千里可以同風固知道合

與瀘州王安撫啟

近獲視事未知為邦因念三揖三遜而外初蒙置酒蓋
得一話一言而去皆可書紳與其誦歎而服膺曷若施
行而布政拊躬自幸拜貺實多某官執德不回作事可
法乘桴浮于海能化嶺嶠之民排淮注之江嘗行吳越
之地觀其威德則皆諸公之莫及語其功效則又當世
之所難慨然有為蓋自三十而立考其已試未易一二
而言某頃登公堂熟聽至論坐之坐而食之食待之有
若於賢人步亦步而趨亦趨繼此當如於夫子

與程安撫啟

千里而來以利國家藹然衆望十室之邑必有忠信況此名邦將何慰於輿情亦惟恃於耆德庶幾矜式可免曠瘼某官抱負智能踐更夷險進居宰輔可為寧王之寶龜傳及子孫亦使郎君之施行馬豈期退託久爾燕閑忽自樂於故山遂無心於當世三千臣之事虞舜豈以耄老而固辭八十歲猶亮武王而况耄期之未至某泛舟至具望履有期春服既成雖喜趨承之匪遠介

主入覲第恐趣召而已行

與趙叅議啟

屬此守邦懼不勝任雖思家戒當修身謹行而無墮偷
猶畏民言或陳義秉法而相譏切所恃賢哲可為此存
某官卓然大才推於當世浚明祇敬兼華陶九德之施
直亮多聞真孔子三益之友宜逢大君子之知己遂使
小朝廷之得人必將審事廢置而處其中如欲救民疾
苦而贊其決推此實惠洽于遠方要歷數諸公開府以

來皆莫如今日用賢之効某本緣逐食猥至分符方有
抱虛負殿之憂無忘應辦所望循名責實之政早議施
行

與交代范才叔啟

魚鳧蠶叢之開國道此阻修雞犬圖書之共船困於偏
仄瞻承在近沿沂忘勞某官才猷靜深器宇凝重隱几
而卧顧名望之自尊閉閣不言已封部之大治諒比屋
之太息念折轅之將行某預憂迂疎莫繼忠厚至是邦

也聞其政皆稱刑罰之何施惟有德者能以寬但撫規模而永歎

再與范才叔啟

泛舟而來是何濡滯解組已去不見跼蹐悵良覲之莫諧撫初心而自失某官躬稟厚德衆推耆英正當收攬豪俊之時豈宜回翔郡國之地才能是用蓋甚武帝汲汲之求筋力何施奚責子思僕僕而拜即應還於魏闕難更屈於彭門某會晤未期瞻依徒切恨不窮日之力

後宿亟至近郊庶乎晷月而已有成一遵善政

答李雅州啟

猥守一邦方愧心勞而政拙相望百里敢言地醜而德
齊竊承視事之初輒致交鄰之問某官政能知要才善
撥煩雖云當塗之所知尤恨用才之未盡遠方何幸盛
德肯臨治績屢聞蓋共稱於循吏交游相謂豈宜棄於
諸侯想召節之遂來恐親仁之難久某無由趨謁但切
馳懷如平生之懽願期會之未卜察鄰國之政當矜式

於所為

答魏普州啟

德原

不見閭里有飲鄉杖者出遠承翰墨如與上大夫言載
味情辭彌增懷想某官政務寬厚世稱惠和富貴不離
身無一日就於燕處鄉黨莫如齒蓋諸公謂之老成深
知治道之無為益笑後生之多事豈宜承流宣化於外
正當饋醬執爵於朝徒切傾瞻何由會晤或時指顧識
童子之釣游安得來歸從邦君之賦詠

答唐昌州啟

守一州之地得免抱長飢之憂道千里而來未克見故人而喜重枉華翰想同鄙悰某官素稱精明屢治煩劇尤善為剴切之論嘗應詔而上書皆謂出忠烈之門宜褒賢而錄後久藏利器尚屈遠方諒必詳試其才然後大用於世某前此未至悵然有懷自入封部而甚驚果覺山川之良異信為故國望喬木而知其尊更考先賢酌老泉以觀其味豈徒賞晤時望降臨

答楊知郡啟

貧無以食尚戀微官愚不自量輒當劇郡迫簿書之期
會屬府庫之空虛正欲謀於老成庶幾有所矜式某官
政踰三最名著一時論才固善於為邦課最尤高於治
賦稱顯諸侯於世盖有成功祿上大夫於家猶稽大用
就閑雖久為樂則多某既至之初未知攸濟要當蹈聖
人之所戒克勤于邦不止從流俗之相傳寧媚於寵更
望誨告以警迂疎

答伏長寧啟

分土治民俱為千里之長撰詞遣使遠辱一函之書靜
而省循豈所宜稱某官戎事曉暢戰多著聞嘗繼伊節
度於安州亦如皇甫正於益部聞瀘川命大府之帥
自漢庭建高牙而來乃謂此邦蓋是君之寵弟時加其
禮有若事其大夫某幸以親仁稽於奉記非敢後也屬
簿書之少閑何日忘之藏懷袖而不減

答嘉州何倅啟

比獲接辭特承告善雖敷陳於治道商也起予顧越在
於他邦回非助我某官凜有英氣蔚為聞人父老惜其
未歸莫不聚歎丹稜之野聲名隨其所至徒以增重烏
牛之山某方此勾稽幾於疲繭每念操刀之欲割使誰
為之藉令飛鳥之復還行亦去矣因報來問愈切馳懷

又答

使千室為之宰未遑晷月之有成取一人拔其尤每恨
鄰邦之所奪更書忽下染翰以辭某官受知諸公見謂

良士蓋久聞於政最俾進列於州端為趙魏則優而不
可勝薛大夫果即傳於治効講齊魯之都而以觀鄒嶧
鄉射乃將去而遠游遂趨公朝必有巨用某尚期過訪
少慰傾瞻是魯孔丘徒但相望而竊歎之景丑氏宿肯
不見而遽行佇聆足音併俟面寫

又答

則吾大夫後徒緣積累以推遷奪吾同官良孰助哀慵
之拊字遠承勞問難副褒稱某官儒學有聞吏課屢最

為當途之識察移重部之劇煩老者安少者懷之已去
思於善政鄰之厚君之薄也皆見誚於鄙夫某深厭浮
辭願觀勝士是故惡夫佞者亦何取於空言曷月予旋
歸哉遂共圖於實効

答潼川袁倅啟

自頃入疆蓋嘗問士大夫曰未可也更察衆言鄉人之
善者好之孰如執事遠承隆翰悅若接辭某官名聞友
朋學有文獻若使論才而定位任漢公卿比從奉使以

觀風喻蜀父老迨其返報宜以同升尚煩泥軾之行未
賜鋒車之召近有里閭之彥已趨表著之朝祖生先吾
著鞭何足多羨衛君待子為政行有特招某惟望終更
即投閑散擊壤當為於一老經邦悉付於諸公必與貞
觀之行秘書俱登要近願繼慶厯之頌聖德盡入詠歌

答邛州蒲倅啟

巢

自金堂之別相望千里之途賜銅符而來將見一鄉之
善況於敬慕尤所詠思某官郡縣著聞里閭矜式謂已

登於通顯何尚處於燕閒不求贏餘僅及中人之產豈
有老大猶乘下澤之車某行遂瞻承願從咨訪頌白不
負戴矣要令父老之相安忠告而善道之正望箴規之
不吝

答叙州杜倅啟

剖符出守初無橫草之功遣使貽書敢辱維桑之敬過
實之語省已何堪某官才能有餘譽望甚美城南舊族
尚傳二曲之風流劍西聞人無愧三蘇之學業未趨召

節猶屈佐州將咏樂郊宜修問牘顧長途之未暇誦來翰以徒慙


答程倅啟

道千乘之守付此散材州三老之家尚其多士辱緘滕之見及知文物之具存某官繼世象賢修身謹行如恥枉道何必去父母之邦誠能居鄉申之以孝悌之義使里閭盡化其德則郡縣皆稱其賢顧此衰遲何其幸會某俶裝已戒就道有期明日遂行庶及鑽燧而改火舍

館未定即當命駕以款門

與眉州倅到狀啟

春服既成念將見於耆德布帆無恙喜遂及於近郊未
即承顏尚勤引領某官積有士望蔚為世家凡先後之
識知無賢愚而稱歎父子之道天也宜克肖於風流季
孟之間待之蓋可量於才美某嘗為同氣之執友亦辱
尊公之薦論茲復游從豈勝幸會



嵩山集卷十八

欽定四庫全書

集部

嵩山集卷十九至
二十二

詳校官起居注主事臣顧宗氣

主事臣呂雲棟覆勘

總校官進士臣繆琪

校對官中書臣王家賓

謄錄監生臣李敦源

欽定四庫全書

嵩山集卷十九

宋 晁公遡 撰

啟

答史靈泉啟

梟

千乘之家而百乘之家俱為分土五年以長而十年以
長何足推尊諒懷占數之私過辱修書之敬某官先猷
不墜治行尤高素業相傳蓋遠自周太史清時何事顧

猶為滕大夫深思徒御之來歸遂作鄉閭之矜式某尚阻會晤冀聞誨言論其土地之宜予之所知也告以仁義之利吾則願學焉

答黎彭山啟

商老

伏承高才肯治劇邑見可而進知難而退諒審擇之甚明臨下以簡御衆以寬必施行之有道某官勿憚巨室先求弊源念粟米之征與力役之惟茲是急彼斗筭之人何足算也無以為憂儻府庫之盡空則郡縣之不立

食焉而怠事既有感於斯言勉旃無多談幸力收於實効

答劉銅山啟

則掩口而對有同事長之恭不稅冕而行無乃就途之遽長牋為貶厚意難忘某官足以決科方將出宰如雨追思於一別于今豈止於三年非法不言非道不行顧相知之蓋久何聞而來何見而去曾莫可以少留感慚之深悵惘兼至

答李眉山啟繁

及瓜而代既解秩之亟歸贈人以言尚貽書而相告敢忘此意有感予衷當今風俗媮媮而愈衰致使搢紳習熟而莫怪賞善罰惡者指其不恕循名責實者謂之太嚴不知多貪鄙之人皇皇以求財利儻亦為苟簡之政蕩蕩而無紀綱或云漢宣帝之時所稱魏弱翁之治以朝廷深知其狀於郡縣頓霽其威蓋志在於用而不在於民故性近於矯而不近於道如其可改則今日之是

而前日之非豈曰相違恐智者有失而愚者有得某官
每欲語上常思用中盍觀九疇建極之辭詳察三代循
環之理寬之敝則必濟以猛弱之極則當救以強正宜
訓迪於友朋安可唱為於言論可以終身行者無若徇
公而滅私今之從政殆而難與同條而共貫願堅其守
以副所知

答彭山知縣啟

有德者進而無德者退初知易置以來不令而行與雖

令不從必能灼見其理茲承至止殊為欣然某官名傳
諸公衆謂良吏今得弦歌之地號為盤錯之難既授版
而不辭想省躬之可辦蓋由才選豈待三注三唱以聞
當察弊源殆非一朝一夕之故勉應有司之課以寬老
守之憂遠辱華牋敢忘厚意

答蘇小溪啟

方此入疆粲然垂問千里而來告之以善宜為謹論以
相規九原可作吾誰與歸今捨大門而莫可某官盛惠

之後舊學猶傳為縣有聲不減績溪之政藏家具在可
讀文安之書聖朝方欲求耆老之子孫指日必遂乘鋒
車於道路某永懷先壻益想遺風下馬尋董相之墳敢
忘故事化鶴至蘇仙之里尚冀神游

答梁山黃教授啟

士曰何以利身皆如市道子可謂不背本乃若古人念
改秩之匪遙識察廉之有自遠貽華翰良佩至情某官
不忘為僚見謂知己當面輸心而背面笑肯同浮薄之

風全身害仁而殺身成頗明歸潔之義薦論何力遠大
可期某聞諸往來久矣嗟嘆顏淵請事斯語誰復能然
宋魑其如予何彼安足算亟為裁報併切感藏

答朱教授啟

伏承命駕相過修辭甚寵肯輟南窗之寄傲已荷重勤
更觀北闕之上書益深嘉歎某官學實足用志將有為
賦王粲從軍之詩蓋嘗出塞歌魯侯飲酒之頌今乃就
閑惟二論雖高而易行何諸公欲留而不可某亦知慷

慨願與講論一言以蔽之固無先於富庶五人者友也
恨不預於游從佇送歸航預增遐想

答宇文教授啟

受成於學方期訪道以質疑接浙而行忽乃終更而告
去共知散地難滯長才某官能讀典墳見稱宗族生于
富貴固無待司業之與酒錢觀其勤勞不可謂先生之
康廩粟蓋得克己復禮之道宜居知經近古之邦自顧
衰蹤敢留逸駕盍見明主當七旬格苗之時載誦來書

若有三宿出晝之意良為感歎莫究敷陳

又答

莅官行法敢辭州縣之勞人主善為師願聞鄉校之議
政過辱事賢之禮仍多溢美之言某官詩書該通才智
茂美下帷受業豈專一卷之師問學質疑可為三益之
友惜將去於序室喜即講於露門某自領牧守之符日
勤官屬之問獨喜高明之特立不以諛說而相期盡信
書而不如無蓋各厭於浮語未免俗而聊復爾乃卒貺

於長牋感恠之深數陳固究

答張教授啟

行役良遠尊江幾見於為沱會晤匪遲飲酒將同於在
泮願見之意翹企于中某官才能優長學問博洽芝蘭
庭內尤多宗族之賢枌榆社中嘗出棟樑之具宜膺召節
入講胄筵某茲喜高軒已臨家塾吾其與點風乎可及
於舞雩子必從周文哉無忘於監代

又答

王式病免歸家誰為講藝曹交請留授業日冀得師今
觀此行良副其望某官才秀蜀士經傳漢儒始學古以
入官不出門而知道笑至海而航斷港肯捨仁義而弗
由觀導江之自岷山必使淵源之有本想大府恨見之
晚而諸生盡出以迎庶幾匪朝遂稔嘉譽

又答

伏承受命茲久聞其却掃而杜門趣駕肯來助我化民
而成俗瞻承良邇欣慰殊深某官讀書既多為學甚富

果進膺於公選俾分教於諸生是邦大夫已佇聞於告
善吾黨小子皆相慶於得師願言疾驅以副遐想

答杜判官啟

念當尊賢未及坐云則坐行遂入境正望聞所未聞何
為膏腴之辭顧乃聯翩而至某官蚤以成德游于諸侯
必將釐正於州綱相與講求於吏道况適丁於多事杼
軸其空豈宜務於空言簡牘而已更期直諒以輔衰遲

答時官啟

事其賢者自顧恐非其人載之空言豈若相規以善但增慙悚何補衰遲某官綽然高才溢於華藻宜追近古之道要為篤實之言如務唇舌之間再斯可矣盍思口耳之外一以貫之儻悉鄙懷佇聞至論

答陳縣丞啟

遠辱貽書喜聞就道勿謂已老自同許縣之聾所冀有為無使藍田之負某官久登仕版必悉民情期會當峻急之時縣邑須嚴能之佐今日之事我為政豈可因弊

以媿安天下莫與汝爭功佇望察廉而稱最何當披晤
速副詠瞻

又答

學道愛人必行其志為丞督事肯曠厥官苟無期會之
稽即稱考課之最某官今將為政何異聚徒日知其所
亡猶察簿書之放散邑無不當問勿容胥史之媿媿使
官屬皆誦其勤勞則太守敢忘於論薦願言匪懈佇俟
有成

答樊縣丞啟

奉法典城正資官屬之相助為丞督事乃辱才能之肯
來將遂披承良深欣慰某官早通吏道本出世家閭里
皆賢蓋襲召公分陝之舊衣冠相繼實從元帝渡江之
行豈謂三秦之英尚為百里之佐某比幸良覲願言疾
驅對南牆之松無但謀於自樂來北山之杞顧肯使於
獨勞

答馮司法啟

汝楫

今之法曹蓋仁恕緣擇於選部須老成人乃能議獄以
不苛可使有邦之無枉某官世濟其美父教之忠士何
貴於決科學要知於從政讀書不讀律顧前賢立論之
未通適重而適輕蓋歷代折刑之所戒得高才而能務
此則老守復何憂哉佇俟瞻承以副屬望

答家司理啟

益部之賢通義為盛諸老如草頭之露乃易喪亡當時
若琴上之星已多零落豈謂行路忽逢故家某官風流

尚存文采甚富聞老夫受天子之命為邦人喜刺史之
來必令耆老之相安宜教衰慵之不逮千里而來亦將
有利使西蜀之皆傳九原可作其誰與歸捨東坡而莫
可姑持此志以謝所知

答張監稅啟

方將之郡未有膏澤下於民何遽飛牋乃與官屬誦其
美殊非所望徒重其慙某官蚤以敏強預於推擇雖踐
更之未至思奮勵而有為君子欲訥於言當念才能之

自効天下願出其路必令商旅之皆來某佇期異時遂
酬斯語使袁遲之有賴顧敷染之奚殫

答王縣尉啟

倫

各居異部特貺華牋謂因論薦而徙官不敢忘德更喜
袁遲之授郡可使足民皆非所堪徒重其愧某官早宿
其業能世其家察廉者至於交章考課者為之增秩盖
由積功累行以致爵位則異衆人安可進賢授能而利
國家以為己力復念老夫之出處欲同長者之戚休相

遺以書殆有過於賀錢萬自量其分何以稱其近古三姑為獻酬莫謝勤懇

答王司理啟

三年使有勇難望古人之功數口可無飢徒竊刺史之祿遠辱貽書之慶知無乏食之憂某官繼世能賢居鄉稱善早致王公之譽近居常伯之銓有如丙少卿之賢起郡獄吏行膺魏武子之舉為縣大夫某久阻披承每深懷詠茲更勤於勞問顧愈極於感藏

答楊茶幹啟

猥居屬部實依喬木之陰敢辱長牋特致維桑之禮第
慚涼薄難稱重勤某官生于士鄉濟以家學洙泗之地
其人皆有俎豆之容崑崙之山所出必為圭璧之寶自
宜得搢紳之敬乃不居幕府之尊有如問其長老先生
修辭甚謹安得裁夫吾黨小子上品或來庶幾瞻承遂
慰傾向某近亦遣使愧弗如儀誦來書之贈言愧其不
能也視前日之上記無乃太簡乎更冀寬明俯垂照察

嵩山集卷十九

欽定四庫全書

嵩山集卷二十

宋 晁公遡 撰

啟

答師將仕啟

受命而來如乘長安廐吏之馬貽書相候皆若單父陽
橋之魚既自謂於雅游何乃同於流俗某官庠序之老
鄉閭所稱久為其黨之師尊宜識斯人之利病屋漏在

上而知之在下盍為慷慨而盡言古學為己而今之為人當察衰遲之有志陳此篤實之論愈於溢美之辭會集匪遙敷陳可畧

答周文學啟

望玉壘之雲瞻依久矣得銀鈎之帖開讀粲然但自撫其衰蹤顧難堪於至意某官尚居里巷未試官曹知柳下惠賢鄉人皆同此論使漆雕開仕老夫嘗論於朝辱懷感之不忘致修書而相問其如銘佩莫究敷陳

答杜文學啟

壯歲讀書乃不預有司之選聖恩優老當少慰平生之
勞被服增光室家亦喜某官始以命士起於諸生新沐
者彈冠得為有官之君子羣居必異席見尊達巷之黨
人富貴蓋由於天功名多在其晚田彼南山而治蕪穢
行將食祿以代耕失之東隅而收桑榆宜勉積功而累
行

答張通直啟

自西徂東想趼足之良倦看南成北顧老眼之何知未
審是行其歸曷月某官恪勤自守溫厚無苛昨者換縣
之始來安於繼粟之不入可取可無取共知處己之冰
清有能有不能將見掄才而器使遠承勞問良切感銘

答侯縣尉啟

才不稱位每愧諸侯之皇皇賢雖滿前孰若一士之謬
謬竭來茲久未副此懷某官居鄉有聞學道自得宜慕
柳下惠直以事人顧如司馬公言皆稱好豈智者之過

慮乃淺哉其見量自今傾耳以須更俟苦口之告

答青神簿尉啟

自領劇煩正須官屬之助雖稽遠大未脫簿尉之中其在衰遲良為欣幸某官早承世祿能習義方惟時有無窮聞必欲功名之遂著為吏視已成事無忘祖考之所行自然居官可以稱最勉哉就列副我察廉

答師監酒啟

乘皂蓋之車未至已慙於父老過青衣之水相迎敢辱

於親朋况獲高文益慙至意某官知道之奧玩易之占
近觀通經學古之儒止為分章摘句之陋莫識精微之
用徒誇誦說之多有能明吉凶悔吝之先則不失進退
存亡之正惜哉斯世達者其誰願聞剴切之言以豁衰
鈍之意何晏不曉者七事想必已得於中管輅莫及其
一言未委可與之進更期會晤併得討論

答梁山劉知錄啟

初無善政誰能既去而見思忽辱華牋乃獨不忘而垂

問褒稱過實展誦增慙某官得道資深持心近厚小大之獄雖不能察念刑罰之惟中出納之吝是謂有司視簿書而甚謹宜膺論薦行遂超升某方在道途亟修竿牘如謂衰慵之可亮無責報謝之不周

答金水楊縣尉啟

舍館定然後求見喜畧識鄉黨之賢日月除曷云其還承獨阻山川之遠方深詠德忽辱貽書某官共推耆年素負篤學韶善而武盡美矣此邦蓋兼二代之文晉材

而楚實用之吾子乃為諸侯之客招延莫可歎息何言
因來幹之告歸布鄙悰而修報

答蘇監稅啟藻

九卿之子譽早著於里閭千里而來職乃當於關市何
為蹭蹬良切歎嗟某官才誠有餘命則未遇文高同學
莫預南宮進士之唱名詩似乃翁俱法東坡先生之屬
句甫登仕版將往算緡請輕之以待來年衆皆有望不
足者而廢中道子豈肯然佇觀刺史之察廉遂錄世家

而登用

答眉州鄉官投獻啟

不圖厚意乃得名邦酌老翁之泉要識前輩之風味訪先賢之宅必有故家之子孫曾未款於門牆忽先候於

道路

未相見云曾未及郊忽先墜問

某官世業不墜鄉評甚高周雖舊

邦有維新之文物魯無君子今焉取於典刑豈容久客於外藩即見榮升於高位某才猷短淺性識迂疎固知民罔中惟爾之中當思勉勵更望子率正而孰不正以

助衰遲

答官員投獻啟

豈無他人而不如同姓故遠從愛弟之游我有旨酒而
以燕嘉賓亦欲延鄉人之善既勤逸駕復貺高文某官
辭章既工趣向甚偉宜求當世之豪傑益廣平生之見
聞過我何哉抑君誤矣曳裾而至盖有踰於冠者五六
人揆藻可觀寧止取夫武成二三策但深嘉歎莫報至
情

答石簽判啟

比自千里而來思有矜式首問一鄉之善願見老成悵
然增懷邈乎在遠某官著父之後交游所稱先世風流
蓋並蘇程之老近時忠厚豈減建慶之賢茲遽辱於貽
書尚不忘於尊吏誦高文而永歎喜前輩之如存勉修
燕辭莫謝至意

答叙州孫監稅啟

頃識先公嘗為東里之縞帶今觀嗣子非若西華之練

裙辭章不凡儀冠甚偉某官深達吏道早知義方作善而賞於朝行致爵位漱石以利其齒蓋有家風豈期相遇於是邦益復追思於雅好某既懷疇昔且歎滯淹轅下之駒何為尚留州縣屋上之烏可愛况見子孫感慰之深敷陳罔既

答孫監酒啟

每見諸儒但修惟桑與梓之敬豈無讜論庶成拔薤置水之規豈衰鈍不足有為故高明未嘗相誨某官年為

耆宿學富多聞欲劾王子淵作宣布之詩不察衛武公
求箴戒於國孰謂無能之一老果如所賦之二章惟善
人能受盡言無乃過量於鄙志有文章能聽規諫正當
見勉以前賢載誦雄篇良乖雅望雖感慚之良甚顧報
謝之敢稽

答朱將仕啟

唐卿

承扣發之甚多慮善以動顧省循之不稱何言之謏安
敢忽忘第深慙忤某官志思相助才蓋有為至于再于

三皆所陳之剴切利不百不十當更熟於討論每誦長
牋具知至意非有求於鄉校徒舖啜而來何以謝於忠
謀聞善言則拜

答謝承務啟

頃與尊公嘗偕計吏為臣者射己之鵠俱選於廷愛人
則及屋之烏况逢其子方欣良覲更辱長牋某官躬稟
異才蚤傳舊學奕奕而有風氣本襲高明溫溫而維德
基尤為粹美夫何不鄙如欲相師儻緣聲氣之同宜思

直諒之益念此衰鈍困于劇煩知之非艱盡盡陳於治道言之無罪必見察於鄙懷屬事不閑裁報甚畧

答新及第楊宣教啟

頃為主司分試諸彥大比三年考其藝不獲盡觀朝取一人拔其尤亦足自喜所得厚矣何辱謝焉某官未嘗窺園今果射策幸逢願治之主將使悉著于篇十哲之列四科吾豈夸多而為貴百夫不如一士子當極意以盡言儻令天下稱別闈之得賢庶幾異日為老夫之增

重

答新及第張宣教啟

比在別頭莫觀舉首蓋如草木區以別無由親選其材
盡使桃李在其門於是莫諧此志何有衰遲之力難當
推挹之辭某官多聞前言深識治道賢能將獻於其上
再拜受之功名要卜於此行一見決矣敢伸善頌以報
來牋

答新及第官員啟

近亦預被漢庭之分命乃在別闈不得盡觀蜀士之綴
文少窺麗藻何為謙謝猥及衰遲某官屢以言揚果膺
籍奏無謂決科之已晚當思學道之可行念是邦文物
之實繁監於二代顧有司品題之所取作者七人賓興
雖少於他州名節要高於異日斯言不負其得則多豈
徒太守之與榮抑亦諸公之改觀

答文將仕謝解啟

榛

尚學尊儒蓋出蜀郡守之後考藝論秀遂預周鄉老之

書皆謂世家當膺鄉舉某官學勤負笈志務肯堂況今
多士之僉言盡歎乃翁之清節抽手板而還丞相確不
可回乘肩輿而見主人超然自得高風如此嗣子宜賢
沛然流澤之有餘行矣決科之可冀益堅茲志即副斯
言

答趙監稅謝解啟

彥材

凡在庠序皆長孟子之詩書見稱主司孰若文王之孫
子果膺論秀共喜得賢某官通書屬文授詩卒業入為

王卿士自先世之多才樂有賢父兄宜盛年之好學勉
哉待問行矣決科獻大夫賢能之書豈徒從於鄉舉上
長安都國之頌當更取於主知茲因華翰之貽畧致善
言之祝

答諸解元啟

預鄉大夫之獻書良為公選為郡刺史以勸駕實有光
榮特枉來牋敢忘至意某人才兼俊造學富淵源遠自
先儒不減西河之化善為高論猶有東坡之風及試於

廣福之庭殆多於矍相之圃鞠躬以入拭目可觀嗟我士無譁不閔有司而不累長上諸大夫皆曰以補文學而以為郎中蓋考行以宜然顧歷年之未有豈其老守蒙此休聲當更懋於遠圖遂前登於高第

答史解元運司發解啟

厭鄉黨之考藝不足發名就計庭而決科俱云得士凡為知識同助懽愉某人為蜀顯家出周惇史非逃於楊而入於墨顧常守於師承豈愚於虞而智於秦蓋始逢

於賞鑒勉登高第以副願言

答楊解元啟

光雅

太比之年將考道藝之士計庭所得多出公卿之家皆
無間言可謂精選某人傳其舊學博以異聞蓋廊廟之
老臣乃大門之諸父兄弟之子猶子信與其衆不同仁
義之心良心固宜所蘊者大還家少憩躡屨遂行請歌
宵雅之肄三看擢禮闈之第一家聲不墜鄉黨斯榮

答楊蒼舒投易啟

主人曾未有言客不先舉老夫况已廢學叟之所知意者感傷其無聞乃以羅列而自獻徒為披玩莫助發揮某人蚤得師傳欲明繫表若止論象數而不究其用則是執章句而有牽於辭要慕聖人之通經五十可以無過常鑒匹夫之挾藝二三動罔不凶何須辨揚雄所準之何如但當戒京房其行之非是苟滯於迹孰識其微念難虛辱於咨詢因輒妄談於陳腐

嵩山集卷二十

欽定四庫全書

嵩山集卷二十一

宋 晁公遡 撰

啟

賀虞叅政啟

王季日朝每問廊廟之老周公朝至即處樞機之廷士
民間乎復來道路為之相慶竊以當天下的青望之重逢
聖君際遇之難試觀經營於四方真可謂之古未見何

至臨御之六載曾不能以大有為或謂強國在得士而固嘗求賢或謂為政在責實而固嘗下詔逮今列位莫副眷懷聽斷者專求己說之勝而各務於乖違按察者但徇私好所在而不公於取捨剛毅強敏則云苛刻而生事庸懦貪鄙則以鎮靜而得名苟思媮合以取容孰肯與衆而為異上雖切於圖治事何由而見功如欲勲格于天無若力除此弊某官兼備九德受知兩宮蓋屬為社稷之臣將使復祖宗之土昨上章甚力衆恨莫能

留公既去位則思帝曰誰復佐我顧還家之未幾已召
節之亟行趣還路朝親御神筆一日不見殆形寤寐之
求三年有成必須功業之就想如蕭何之謁而見高祖
盡用姚崇之說以要明皇浸潤既知取彼譖人而投畀
吳吁俞以戒不與舅氏者有如河某得於傳聞為之感
歎喜君臣之相悅信載籍之所無遙計倚毗太尉相尊
等爾孰謂愚蠢小子胡汝往哉惟更授於閑曹庶少安
於孤立茲為大幸實倍常情

賀虞樞密改除宣撫使啟

聖主乃眷此方慨然南面而歎諸將未有所屬命我西
樞之臣往臨漢中鎮服境外豈徒連營喜而動色固亦
敵國畏而寢謀諒天啟於睿衷使公畢於能事蓋新安
之晚歲頗失統御之和况武興之重屯莫知什伍之數
盡除斯弊今正是時某官深被東知再居宥密必為國
家畫經久之策遂於疆場圖備豫之方宿兵三邊而部
分未甚明綿地萬里而緩急何以守莫若坐轅門而申

令咸得超軍伍而自言各相推舉足以見議論之公退
加考察然後究才能之實昔周世宗於是拔以次而為
何徽之代近曲將軍以此選於衆而得吳玠之才既擇
良將而付之戰攻又建強藩而為之扞蔽果令形勢可
得而恃則免倉卒不知所圖是為節制之師悉據要害
之地明公可歸廟堂而端委有事則出羽檄而指揮一
定規模但觀機會當宁垂衣而何慮寰區奠枕而不憂
率土之濱莫非王臣兼可收於故地生民以來未有夫

子孰得比於元勳某竊願明公之名高出古人之上輒
陳鄙夫管穴之見皆本當世搢紳之談敢冀高明或垂
採納

謝制置啟

七里之郭久矣汗顏六轡如絲忽焉在手不待臨軒而
後遣益慚充位之無堪况此詳讞之司最為頽敝之極
雖近有馮大夫之可紀蓋嘗為沈益州之所知然治閭
里之民而不問其官曹惟按郡縣之吏而不及其左右

莫識大體徒為小苛果欲去姦猾委靡之風宜遂用剛
毅正直之士夫何孱瑣乃使循行此蓋某官宜居九官
來鎮四道蘊旌別淑慝之鑒懷惻怛慈愛之心事有可
言奏章屢上而無所畏罪或不赦諸公力請而安可回
陰察夫牧守之否臧將請於朝廷而廢置如謂愚蠢或
異輩流致膺禮樂之光華必自門牆之論薦某益思自
勉要有可觀有邦有土而告爾祥刑豈惟奉詔載馳載
驅而周爰咨度弗敢憚勞

賀制置加寶學啟

聖朝考績明詔疇庸巍乎昭陵之圖書寶為大訓嘉我益州之連率共惟帝臣遂正學士之名式重大府之寄尚嗟其晚未稱其才某官謀猷沈深器宇凝重望其容貌足以使朝廷之尊聞其風聲自然增習俗之厚九牧所歎三年有成錦城雖樂而不如還家屢形奏請蜀地之易而猶履平地方播詠歌將以慰故鄉之思於是申延閣之命某適依大厦之庇尤願高牙之留况眷倚之

意推挽於前而巡屬之情感戀於後幸承平里閭之無
事與優游鄉黨以何殊仍歲有秋民皆安業為國強飭
公勿言歸

賀張茶馬啟

帝誦在垌之詩歎其政壞公由將漕之最就以節行咸
謂精選而來必有大革其弊姦吏懾畏士夫歎嗟某官
深通政經素蘊賢業周旋要近而乃稱裁剝煩劇而有
餘屢更艱難親與士卒而同甘苦能發隱伏一見簿書

則知詆欺共惟宏才宜任計相屬以著籍之數駒不舉
書甚者去歲之終馬以連死慨然當宁念此曠官安得
如唐太僕之良四十萬匹何以充周天子之廐一十二
閑遂膺委寄之隆即觀蕃息之盛某所欣同部即獲並
游亦喜此物之逢時皆蒙伯樂之顧佇見他時而入貢
復作穆王之圖

謝張茶馬啟

分土治民莫上三年之最受命乘傳忽預八使之行與

賢哲以同升撫迂疎而增愧某官抱負仁義通達古今
善論國家因革之宜如指諸掌不擇內外險夷之地能
致其身帝憫其南鄭風霜偃簿之勞詔休以西蜀山川
便安之樂輶車久駐於關塞戎落多知其聲猷少待初
陽必扈鐵驪之駕盡來絕足不煩金馬之齋某蓋久睽
違每深懷詠幸共居於治部要皆奉於詔條天下憂而
憂况嘗聞於前輩夫子步亦步更當効於宏規

賀陳茶馬被召啟

側聞當宁思見異人豈有天下之才使其久外茲出省
中之詔趣以亟還諒對路朝即膺大用竊以謀國者求
其必合則忠言孰敢進事君者憂其不悅則直道安得
行儻陳利害而甚明果獲盡聞於上或觸忌諱而不用
是亦無愧於中雖微功利見於當時要令歎息稱於後
世庶幾昭代不謂無人而况遇於聖明每思獻納寧不
容於忠直莫見聽從惜諸公畏避之滋多致累歲寂寥
而可恨察其用意本所願持祿而養交遠者踰年終不

免奉身而去位觀聽之士屬望於公某官毅然有為卓爾特立昨乘傳而始至曾坐席之未溫方觀號令風采於七八月之間已得根株窟穴者數十年之弊聲績遠播蓋若鶴鳴聞于天市廛大驚乃見鼠輩尸諸市前者未有凜乎其難屬求治於臨軒數興嗟於當饋丞相之印頻上政事之堂屢虛凡束帶而立於朝誰其勝任將審衆而求諸野冀以得賢忽焉眷懷惟我權牧察所用於蜀部信可移於漢庭辟舉無私官屬不可請謁而得

摘發皆當姦猾於是次第而除審參政謀必副上意某
輒忘蠢直仰揆高明能受人之言者然後能諫君能好
人之訐者然後能遠佞幸無計於用捨期自比於聖賢
成功則天固知其數之已定有辭於世將書於史以無
羞自今以還傾聽以待

賀張遂寧啟

起於真祠授以督府朝士昨聞而歎息何乃遽歸天子
尋為之驚嗟夫豈不用茲頒明詔允穆輿情某官如古

爭臣負世重望至今表著之論士皆稱切直而盡規大
疑謀心及人後雖咨衆忠言逆耳利行誰復似公頃居
夔部之時亦上漢庭之奏力陳阜棧之性難涉江湖之
行果驗其言馬之死過半矣每觀所至獸相食且惡之
信為蕃宣之良尤推慈惠之最未容報政即入告猷某
不喜一方之民獨霑九里之潤所願執事等輩盡登輔
相之尊遂使今日朝廷再若祖宗之盛

賀張潼川啟

懷箕子明夷之學既幸逢西周之時歌召伯甘棠之詩
乃出聽南國之訟若時有識竊相與言使施於州郡雖
及民者多留用於朝廷則為効也大遙想提封之相慶
第恐召節之復來某官時為通儒天降大任至今廣漢
之政冠絕有唐以還大易之書能知夫天地鬼神之狀
平生所至但見於簿書米鹽之間顧其施為蓋已俊偉
比超升於華省謂盡究於雅懷豈謂明公遽以疾病而
辭遂令當世莫見功業之就上亦歎息恨難挽留進直

裕陵圖書之藏上應奎壁之象并付潼江形勢之地中
分參井之光殆與成都俱稱重鎮某行當辭郡忽預按
刑安得聲名籍甚諸公之間良資推挽敢忘天下譬如
一堂之上更盡哀矜

賀樊瀘南啟

守邊最為任重詢黃髮則罔所愆當宁深知公賢錫介
圭以作爾寶想六纛之既至同三軍之晏眠人其相安
坐以無事某官柔嘉維則悃悃無華語人必極其言吾

無隱乎爾為政莫見其迹德其至矣乎蓋平生不求於
勇功而措意專用於誠服逮茲臨闕塞之地必有以得
部曲之心推其教化可以厚人倫施其忠信可以行蠻
貊姑且居蕃宣而作牧行當盡尊事以乞言某雖異提
封尚鄰樂土顧此防虞之戍介于堡障之間今喜諸葛
亮之度瀘南人不復反但恐太公望之在鎬東海其盡
歸

賀利路張提刑啟

朝廷念大臣之家仕者托落制詔出少府之節命以循
行知寬厚之有餘舉平反而相付遙想其部相慶於途
某官所至按臨尤稱慈惠凡千里皆歌舞其賜無一夫
不蒙被其恩蓋推父母之情亦各言其子也雖是胥吏
之賤何以異於人乎殆可求於前賢顧難論於今世專
務省事剖斗折衡而民不爭庶幾無刑導德齊禮而恥
且格某佇聞課最即報召還遂登近侍之班不止今日
之賀

賀利漕王參議啟

送以禮樂之華當調兵食佐我樞機之老仍參軍謀傳
聞皆謂之得賢衰朽更欣於接壤某官學為足用志欲
有為固已朝廷不次而屢遷然於才畧猶蓄而未究茲
輟廣陵督之任遂從仁壽公而來諒懷先猷是為舊鎮
按形勢之具在歎規模之可尋方盛年以臨漢中慷慨
而將有立顧當時之制閫外忌嫉而不能容豈上天深
惜於前功使後嗣克成於今日賓主相遇古今所無想

九原之驚嗟吾不如也聞一時之措置人皆仰之某幸
忝心交莫遑面賀令舉世始知於吾黨故爾不凡要平
生濶視於斯人有以自重

賀查總領啟

南向而朝甚念虛名之重賦西顧而歎不圖橫議者累
年欲寬此四道窮困之民當用茲三館英俊之舊制書
初出歡頌載馳必使聖主美意即日而施行於是遠方
彫郡自今其蘇息某官議論精確詩書該通豈特涉道

之尤深要皆適時而有用昨去漢庭而出使最怜夔部而軫懷代民之輸以鉅萬計愛君之至蓋不二心尋命乘輅乃來易地相承玩習至於簿書圖籍之盡亡立為更張粲然法度憲章之具舉諒應休問亟徹睿聰餽餉永久之規須其裁定詔令復除之惠待以布宣如止取辦州縣之間何以滿副朝廷之望既膺重寄當有遠謀某竊揆高才盍登大任非喜明公之居是職民以為小不亦宜乎但喜斯人之得明公助而不稅則皆說矣

嵩山集卷二十一

欽定四庫全書

嵩山集卷二十二

宋 晁公遡 撰

啟

賀成都鄭運判啟

丙

益州最號富饒實為重部漢庭不輕畀付必屬名臣諒
治狀之升聞果制書之寵授聲華素著歡頌已騰某官
望重諸公才高當世每見嗟稱於廟堂之上蓋嘗揚歷

於畿甸之間故事皆先治民爰出於外大夫有可利國
益觀其能衆語此方帝勤乃顧丞相以謂盍使公往天
子若曰其如予行八百萬緡之給軍當四路財賦之半
一十六郡之除吏有二選銓衡之權是惟天官地官之
所難將見大事小事之皆舉並委茲任即還于朝某佇
諧瞻承深慰疇昔一身二任方憂攝官事之不堪百拜
三行日望從燕私之匪遠

賀潼川馬運使啟

南方之強共深推服東人之子今喜按臨見膺使之用
賢識聖懷之念遠循行云始歡頌宜多某官嘗代王言
尤高朝望謂當正鳳閣之位顧乃乘熊軾之車在於一
時可為冠冕視此二郡真若秕糠縱未還供奉之班豈
容置鄙小之地久使外庭之留滯仄聞黼扆之咨嗟君
薄淮陽耶若有倦而欲去子於天下也蓋無施而不宜
姑領轉輸佇膺趣召某比聆乘傳即欲修賤計其道路
之勞重以簿書之事至中昃不遑食何暇報書既數月

金
卷二十二
可以言敢無通使其為欣詠莫究敷宣

謝樊運使啟

錫之山川謬為分土送以禮樂不待臨軒雖視事以觀
風實撫躬而懷愧某官聲滿益部望高漢庭以九德俊
乂之才當一方循行之任軺傳所至無不砥節以向公
郡縣之間各皆奉法而循理豈特巡屬相慶於路亦喜
迂疎遂逢其時某尋已問途即將覲德顧平生未習其
事何以使好生而洽民心幸長者肯與之言庶幾乎奉

使而稱上意

答任都統啟

上將軍處右特畀兵符諸大夫曰賢實諧公議豈止師
徒之喜悅當念疆場之晏安蜀之人同辭相賀某官
勒功帝籍布政和門撫士卒而有恩臨戰攻而無敵昨
閫外初失於大將而軍中相與之聚談雄名素高羣望
所屬授以將印無復一軍之驚坐于敵場可決千里之
勝遂膺簡拔共歎聖明遐邇傳聞咸謂新安王之尚在

部伍整肅必為仁壽公之所知某亟遣行人往馳慶牘
念英豪之既用計恢復之可期已幸平居皆得着牀眠
矣更觀他日跪而推轂遣之

答前變路憲李敷文啟

言歸樂郊喜遂雅志臺中論列正是北山之移文林下
優游乃獲南憲之寄傲其失何有所得實多無毀於後
無憂於心蓋為韓愈之歎羨俾昌而熾俾耆而艾更享
魯公之康強佇俟安車之來要當舉酒以賀

賀利路王漕啟

遠乘軺傳往當邊境之餽糧近讀訓詞知自公朝之論
最列城胥勸清議攸歸某官鄉閭耆英郡國高第學既
優而適用才屢試而有聲蓋聞諸公之言尤稱綿谷之
政想部封之相慶喜使節之復來一日不見如三秋於
以識周邦之意六卿各率倡九牧必能分主計之憂凡
屬循行皆居要害接連秦隴乃犧牲玉帛之交鄰按視
褒斜尚流馬木牛之可運某雖相先後俱被超遷較量

遠近之各殊委任高明而實重自茲考績行矣趨朝甫及飛牋之還更期進牘以賀

答王興元啟

天子之命將帥咸謂得賢官府之聽師田竊承視事諒三軍之相賀與百姓以同辭某官久著勤勞尤高韜畧陳行戒我師旅蓋能禦侮以折衝成績紀于太常屢已策勲而舍爵屬當宁有西顧之念謂重兵屯南鄭之郊皇帝若曰孰為予行羣臣皆言莫如公可况深懷於大

志必遐想於古人上坐而對漢王拜將之壇猶在傳檄
而定秦地引兵之道具存既膺委寄之隆可待功名之
會某方謀修問先辱貽書豈徒感愧之多更益瞻依之
切

答眉州馬舍人啟

外事而問瞽史既卜是日以按臨太守而用近臣益使
此邦之尊重江山改色道路載謠某官逢時休明致位
清要既從容於相府亦潤色於王言夙興夜寐而每告

於嘉猷旬除歲遷而當究於大用而乃乘傳車而去國
予印綬以牧民迨武信之政有成宜承明之廬再入復
移使郡使近故鄉遠如楊元素自集賢校理而請于朝
近則周表卿由禮部侍郎而為之守閭里皆傳於故事
廟堂諒悉於高懷某未果修書先承陞問佇觀宣布即
作中和之詩無念歸休或尋遂初之賦

答楊蜀州啟

廝養為御而歸蓋自長安之廢舍館未定而見已拜大

夫之勤迨涓吉日以布宣復辱長牋之寵問某官比對
明主見稱賢才由朝廷不遠而來想父老甚喜其至皆
云太府乃是懿親陟彼岡瞻望兄兮顧方臨於彫敝若
潤澤則在子矣必大有於蠲除既深慰於疲民更將觀
其治狀某交游實舊封部幸同蘇孺文與飲故人敢忘
乃好朱子元出教主簿勉率其僚無使衰遲更勤督課

答何隆州啟

至麥秋而出輕繫當思故事之修說桑田而命倅人敢

憚征途之遠華賤見貶炎暑頓銷某官布宣詔條奉若
時令乘以朱路莫陪聖主之朝穆如清風但濯遠民之
熱某願觀善政行及樂郊自顧衰遲豈同趙盾之可畏
盡令決遣惟冀臯陶之無刑

又答

乘傳長安子既懷印綬而至出節少府我亦叨禮樂之
華與其更修賀問之書不若各務安集之政某官嘗憤
流俗欲追古人儒於道最高要相與有為於當世文勝

質則史豈但矜無用之空言近時部使者以濶畧稱賢
所在州刺史以委靡為事盡自吾二人而始遂變此一
代之風願戒吏曹不宜以身試法勉修職業安可恃舌
得官諒深識於鄙悰顧無勞於多誨

答何邛州啟

自立貳於官府即以最聞不待見於側門遂膺郡寄必
大圖於稱塞庸上答於眷知某官共推高明善治煩劇
常人則懼於顏敞能者豈憚於更張視其所以而觀其

所由識紀綱之攸壞饑易為食而渴易為飲致功利之
無難今在按臨古稱富實以卓王孫運籌算於下童至
八百人况漢郡守有權勢之尊秩為二千石何憂匱乏
當究設施某願與牧守之良同承制詔之意雖復胥吏
至賤豈欲笞罵薄責其人惟冀郡縣多賢皆上訟理政
平之狀敢期盛德深諒鄙誠

答叙州王鈐轄啟

錫之山川已慚分土送以禮樂不待臨軒方懷莫能勝

任之憂豈謂遠勤飛書之賀某官名高閥閱世載勲庸
雖圖畫不預於南宮共推先烈顧臚句合傳於東閣入
侍清光尚煩絕塞之行即有真符之賜擘輕紅而飲酒
當喜燕閒建大赤而誓師豈忘宿衛未皇言集徒切瞻
依

答鮮于參議啟

延賢人而起館久游漢相之門拜節度之參謀增重嚴
公之幕想聞其至延佇其來某官性資剛明氣節慷慨

遇事有通達之識居官得治辦之名常誦尹賞之言勿
坐軟弱蓋如王尊之政專鉏豪強使處二京良吏之間
可當三輔都尉之任乃者頗稱於公議惜其尚屈於賓
筵此聲行徹於睿聰不日即膺於大用某向風久矣聞
問欣然重以婚姻承不忘於雅好報之瓊玖愧莫効於
鄙誠

答吳綿州啟

慨然上章自請治劇傳於闔境皆謂得人惟父慈子孝

之俱賢顧訟理政平之可必即當辨治不待循行某官
其資高明所見宏大伊呂之國土地傳序久長耿鄧之
門子孫被服儒雅宜居論撰之地行升供奉之班暫勞
為邦以待舉最某日冀斷獄之刑無枉并令供上之貢
以時不復憶有一州當副朝廷之所望可以兼治三輔
亦知才力之有餘因報來牋輒陳鄙意

答達州程知郡啟

錫之山川已慚分土送以禮樂不待臨軒方懷莫克勝

任之憂豈謂遠煩飛書之賀某官深識吏道見稱士夫
蓋因三歲大計之時遂守五相舊游之地頃頗聞當途
之議欲使見側門之朝衆相與言不知而作者帝果有
語胡為乎來哉想置郵之初傳舉提封而胥悅某方此
休舍勞於應酬儻肯顧於迂疎願更垂於戒告

答宋嘉州啟

共知上意將用於朝更授大州益試以政兼接連於荒
徼當申固於邊防必令疆場之舉安不獨里閭之無事

某官多所聞見生而高明父教之忠蓋自典刑之後世
濟其美有聲郡縣之間比報更書即思就道雖歸掃於
丘墓誠是雅懷顧見知於廟堂寧容高蹈某昨居鄰壤
每聽休聲猶限阻修豈若吾身親見預量臭味先得我
心所同正冀披承以慰延佇

答梁彭州啟

並游三館不待富貴而後歸出把一麾乃乞便安而遽
去屬鄉閭之接壤想封部之聞名徒馭既臨道途相慶

某官蚤以高第稱於諸公宜即置於中朝顧屢居於外
府迨北趣召謂將久留遂登言語侍從之班以極論思
獻納之用忽詣廟堂而自請願懷印綬而亟行此邦剝
膚推髓之餘其民痛心疾首之久俎豆之事而軍旅之
事皆百姓之是供布縷之征而粟米之征先一年而預
取其如惻怛必為拊摩雖整頓綱者為力暫勞然繼敝
政者收功甚易鈎校簿書之緣絕推求賦調之負逋於
是沛然有餘幾若儲以相待少廢笑談之頃即成富實

之資某近者按刑由於延譽太和在唐虞之際同遇明
時此聲揚梁楚之間敢忘君力

答楊榮州啟

父老歡迎得見益部之耆舊官屬歎服共知漢吏之循
良無煩條教之施不待朞月而治某官忠厚稟德慈祥
愛人聞參佐之甚才兼蓋藏之不匱真是沃饒之地不
減郇瑕少須畫諾之勞盡付孟博某念睽違之未久辱
寵問之已來公侯之事而公侯之宮尊俎遙知其燕樂

子弟多賴而子弟多暴鄉閭獨遠於師承其為瞻依未
易敷寫



嵩山集卷二十二

欽定四庫全書

集部

嵩山集卷二十六
三至

詳校官起居注主事_臣顧宗泰

主事_臣呂雲棟覆勘

總校官進士_臣繆琪

校對官中書_臣王家賓

謄錄監生_臣李敦源

欽定四庫全書

嵩山集卷二十三

宋 晁公遡 撰

啟

答劉漢州啟

聞帝語於朝可使從政奉計最以報何待來年想耆老之聚談喜近臣之出守某官通達治體博極羣書富哉多聞蓋得黃香之未見識者太息乃與公叔以同升謂

將以斯文大用於時顧亦及吾兄相繼而去共惜通儒
之久外諒應宣室之深思即有鋒車趣還華省某每懷
景慕尚阻瞻承屬小司寇而士十六人猥當任使位下
大夫而臨二千石實負兢慙重蒙寵問之先益佩至情
之厚其為感忤未易敷陳

答任恭州啟

遴選具僚乃施典而建其牧入對宣室親見問而觀所
繇遂分守符必稱上意某官蓋有士望屢為人師萬民

惟正之供要在先行於直道六藝致治之法豈特可教
於諸生况聞德音近在文陛有君子之道嘗啟沃於聖
聰語大夫於朝其傳承於邦憲某不獲同部敢忘素交
子路有聞而惟恐有聞盡力修於善政楚人之長而亦
吾之長顧難稱於重勤徒為感藏未易數寫

答宋知監啟

比聞計庭使待詔命吏民相語無以我公歸今朝夕以
須事其大夫賢者復還州部想慰羣情某官克對前修

共推令望遠自先代言嘗在於北門實為故家藏書
上應於東壁能傳舊學宜列路朝姑領林鹽之饒即有
鋒車之召某久違合語忽展來牋冷厭蜀交益念友朋
之作別誰謂宋遠恍疑顏色之在前其為忻愉未易宣
寫

答吳永康啟

太府奏聞稱弱翁之治行行路歎息猶季子之來歸蓋
皆謂復至是邦必有以深副其望某官澹然近道卓爾

有才益州未嘗輕論於朝一朝遽以舉其最蜀人相與
竊議於下三年何以報所知宜更過前者之己為夫然
後魏乎其特立諒在高明之雅意亦思振耀於當途使
衆言其上之知人未有於此時者而君得斯名以垂世
豈不誠丈夫哉某屬按列城佇觀善狀勉遵循吏之為
政以直道而行要令諸公之露章不一書而止

又答

比知入境即遂臨民雖恨命駕之遲歲云暮矣庶幾為

政之美予日望之載觀貽問之甚勤亦若在公之匪懈
某官功效已試民情所歸曾未號令於一日之間已竦
觀聽於千里之內吏民皆喜於復至則往拜其門父老
相顧而有言何以利吾國必滿其願不勞而成某嘗幸
游從可忘規益君子欲訥於言而敏於行無為翰墨之
勞天下皆耕於野而出於塗宜副朝廷之意

又答

讀闕里之書百未一試修竿牘之禮三茲益恭承丹詔

之初頒諒朱幡之增重某官臨事而懼終夜以思但見
府庫再來而皆空虛豈有版籍具存而乃匱乏蓋無政
事則財用不足惟勉布於教條非居卿中而名實未加
咸習知於威信請移染削之力盡按豪強之家自然富
饒之可期想應思慮之已及謹同衆聽以俟政成

答李富順啟

遠貺以書如事其長我為我爾為爾蓋各在於統臨辯
亦辯言亦言顧可無於酬對但增厚媿曷報重勤某官

傳家直清為政果藝惟其才之屢試凡所至而有聲來
守是邦適當其弊昔刀筆箱篋以為大故徒然憂勞今
旗幟壁壘而皆精明見者驚歎在察舉者宜論其治狀
使褒寵之以勸夫具僚某深佩至情曲敦雅好常念吾
弟與兄之室弗居乃從君游執子之祛無惡莫詣集處
徒切傾依

答劉懷安啟

伯虎

一乘五十七人初臨千乘之重八州五十六正相望兩

州之間豈謂封部之殊乃辱書滕之厚若事其長殆非
所堪某官世祿之家官宿其業惟曾門之盛德為元祐
之名臣承此積累之休宜其昌熾於後有酒食先生饌
致其祿及親之榮知稼穡小人依體吾君愛民之意佇
登高位益慰慈顏某每念天倫獲聯姻好蓋子路妻之
兄弟久服高明如賈誼任於公卿行觀進用

答史梁山啟

猥從支郡遽按祥刑相好者譽之過情以為勝其任也

不悅者為之竊議何以異於人哉敢謂愛忘亦貽慶問
某官學優則仕治移於官方朝廷核名實之時屢下明
詔儻郡國上課最之狀必有異恩計指日之合符即論
功而增秩某昨居牧守之職屬在執事之先惟是心存
於愛民可為智者道若謂地有於遺利當如後患何幸
其辱明哲之知不以為迂疎之過衰遲何有彫瘵其蘇

答瀘州高倅啟

下喬木而入於幽谷不恨此地之徊翔居是邦而事其

大夫乃喜吾兄之集處更尋雅好遠貺華牋某官敏則
有成果於從政蓋屢書於最狀亦耆剖於守符茲除司
馬之官顧為節度之府耕王之野而欲藏王之市無忘
勞來之勤小國之君而當大國之卿宜念推遷之重某
睽違滋久懷向良深屬來使之亟還愧占辭之罔貺

答瀘州張倅啟

辱貺以牋如事其長謂居屬部境雞犬之相聞行佐他
州風馬牛之不及過承稱譽徒極兢慚某官藹然粹溫

輔以忠厚十年種木顧卜宅之已成五月渡瀘尚更書
之未至方當炎熱宜在宴閒北窗之風時來雅堪高卧
南山之豆既種可樂豐年何為涉遠道之行乃欲從諸
公之謁亦煩臨訪良切感藏

答漢州師倅啟敏功

七月流火顧徂暑之未衰一介行人持華賤而相問不
覺開緘之際頓忘攬轡之勞某官為政惠和相時長養
莫居近侍詠殿閣之生涼但體眷懷助道途之扇暘念

及疲老困于馳驅辱勞苦之甚勤歎情文之俱備固已
欣快執熱而濯清風况當從容近君而如白雪其為感
忤未易數陳

答漢州趙倅啟

主出迎而右入喜見道途之歸吾極知其左遷想識人
主之意暫淹逸駕聊佐名城某官少而讀書樂於為善
豈謂才能之特立有為吏議之弗容非止世祿之家則
從大夫後焉有宗室之秀如此罪罟何雖一洗於刑書

顧尚憑於泥軼昔汲黯自免官而守楚地張敞起亡命而典冀方況在公朝度越前古行詔太常之書贊復分刺史之守符今其少須將以繼賀

答眉州樊倅啟

乘別駕之車已至治所佩刺史之印兼按郡條習知風俗之宜殆可笑談而辦某官飾以儒雅粹然中和至今外邑之老人尚誦當時之美政而乃自列大府願選守臣儻復去此而為邦豈有不能於前而能於後勿令識

者之竊議以謂無難於縣而難於州理必不然人誰肯信與其循牆以走退避而不敢當曷若直道而行慷慨而有所立幸察袁遲之語佇期善最之聞

又答

錫之山川已慚分土送以禮樂不待臨軒顧非小己之堪任敢辱長牋之稱譽某官周旋中禮悃悃無華頃嘗至於是邦尚多談於厚德交游皆歎其莫及休休焉有容父老今聞其復來欣欣然相告某遽乘輶傳初解兵

符怜其老與賓客而游遨維莫諧於集處使其親為喜
笑而飲食更相助於平反

答閻判院啟

載馳載驅猥被煩使將安將樂敢忘素交顧修問之未
遑辱貽書而良愧某官乃者會晤翕然歎嗟謂其臭味
之攸同頗以狂直而相許得見狷者斯可矣蓋嘗憤風
俗之衰非曰能之願學焉亦欲副友朋之望迨茲除授
敢不激昂益知用捨之皆天深悟窮通之有命不求而

得愈自信其行藏無忝所生當更思於負荷

答隆州李簽判啟

立其監設其參本為陪輔顯諸仁藏諸用要善彌縫想
賢者之既來必歡然而相得某官居官持重臨事好謀
昔嘗為一邑之長而已洞悉於事宜今所臨百里之吏
其孰能欺於視聽况復刺史心知之久自無近時位偏
之嫌魯平公豈惑於臧倉天寧捨我孫伯符能用於子
布名實在孤不待踰年俱當論最因報來牋之辱益增

欣詠之深

答懷安馮簽判啟

施於有政久聞其名挽之不來良失所望敢辱貽書之
禮見稱知己之恩某官蓋出世家能通時務嘗以文無
害而居大府至於聲籍甚而游諸公屬此嘉陽鄰於邊
徼尚闕牧民之長頗為分閭之憂今之居官猶正牆面
而立也公乃抗論不越尊俎而代之顧會晤之無由但
瞻依而彌切

答榮州呂簽判啟

空虛囹圄居官方愧於未能跋履山川遣使遠煩於相
問靜言迂拙難副褒稱某官出自世家通知吏道觀大
邑通都之治見遺風流俗之存非虎非羆而非熊非羆
蓋克肖於尚父有駢有騏而有驪有駘尚遵法於先公
行刺大州遂據遠畧某載誦來教敢忘重勤如居是邦
而事其大夫欲酬盛禮顧燕嘉賓而將其厚意未卜何
時

答權綿州李簽判啟繫

一年之內三徙其官雖考績論才為巴蜀之士稱首而奪彼與此使隆彭之老怨嗟獨想提封悉云多幸某官所在舉最久聞當途凡有蠹壞不治之邦皆冀疏理盡除其敝諒其體國無以告勞何為貽我以書而有辭乃謂捨己之田而興歎普天之下莫非王土但可致於撫綏好生之德洽于民心必更宣於寬大豈止副聖明之屬望亦以佐衰老之平反行遂披承併期敷叙

答郭運幹啟

明復

在官而事兩賢可謂遇合去家而無百里不廢問安既
居幕府而優游兼遂寢門之溫清某官少能自立壯欲
有為常思富貴以榮親每喜慷慨而論事今雖養曾哲
必有酒肉乃得賦祿之良多何由辭靈丘而請士師來
佐按刑之不逮遠貽勞問彌切瞻依

嵩山集卷二十三